

O FOGUETE

O foguete sobe ao ceo
como un raio.
Perde forza e cae ao chan
nun desmaio.

O foguete chega ás nubes!
Que bravura!
Que de estalos! Que bruído!
Pouco dura!

Mais a cana do foguete
cae de plano.
Que aguillada de xoguete!
Que galano!



A FESTA DO PATRÓN

É a festa do patrón
agardada o ano enteiro.
Se a banda está tocando,
está calado o gaiteiro!

Son as festas do patrón!
As campás a repicar!
Foguetes de sete estalos
polo ceo a retumbar!

Todo o pobo está no adro,
que é a festa do patrón.
E San Xoán vai moi ufano
presidindo a procesión!

É a festa do patrón!
É a festa de San Xoán!
Bailan os mozos e as mozas!
Moi ledos todos están!

É a festa do patrón,
do patrón do meu lugar!
Todo é hoxe diversión,
e mañá..., a traballar!

